

Date – 27/01/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoman vawiin khan CSR diltu leh a petute inzawna tur leh inthlunzawmna tur -CSR Matchmaking portal, Mizoram CSR Connect a hawng.
2. Mizoramah zirna tha zawk a awm theih nan leh by-heart system tihbo a nih theih nan MBSE Pawl 10 leh pawl 12 board exam result-buah Top Ten leh Division tih lan a ni tawh dawn lo.
3. Lai Autonomous District Council Sorkar thara Chief Executive Member niturin MNF Member Pu C.Lalsawmzuala chu vawiin khan lakluh a ni.
4. India leh European Union chuan vawiin khan Free Trade Agreement chhinchhiahtlak tak an ziaak

<><><>

CM

Chief Minister Pu Lalduhoman vawiin khan CSR diltu leh a petute inzawna tur leh inthlunzawmna tur -CSR Matchmaking portal, Mizoram CSR Connect a hawng.

Planning & Programme Implementation hnuaia Mizoram CSR Cell leh UNDP India tangkawpin an siam a ni a, hawna thu sawiin Chief Minister chuan, Kum 2023-24 CSR data atanga a lan danin Mizoram chuan India rama CSR hman chhuah zawng zawng zaa 0.06 chauh a hmu a. CSR hmangin hmasawna hna lian leh tangkai tak tak a thawh theih avangin kum 2024 June thla khan Chief Minister Office-ah CSR Cell an din ta a ni a ti a, an hmalakna zarah a petute leh a diltute inzawna Matchmaking Portal - Mizoram CSR Connect hi an hawng thei ta a ni a ti.

UNDP India Resident Representative Angela Lusigi pawh he hunah hian telin ram hmasawn t ura hmalakna an ngaihpawimawh chu khuarei daih hmasawna (Sustainable Development) te, hmeichhiate chawikanna te, nungcha leh ramngaw venhimna lam te a ni a ti a. Hmalakna hlawhtling turin data dika innghat ruahmanna neih a tul a. CSR hmanga hmalaknate pawh a hlawhtlin theih nan data dik behchhana ruahmanna siam leh kalpui a pawimawh zel a ti.

He hunah hian Mizoram Start-Up Mission leh corporate/ institution pahnihten an inremna (MoU) lehkha an in hlang a, hei bakah hian hee hun hmang tur hian ramchhung hmun hrang hrang atangin CSR pe thei corporate aiawh te leh CSR dil thei pawl (Agency) aiawh eng emaw zat an kalkhawm a ni.

<><><>

ASSAULT CASE

Aizawla North Vanlaiphai tlangval Richard Lalhmingliana tualthihnaah Police ten pawikhawihtu ni a puh, H. Lalruatmawia chu an man tawh a, tualthah thubuai ziahluh nghal a ni.

Akashvani News Aizawl zawhna chhangin, Aizawl Addl. SP Pu Zoramthara chuan pawikhawihna thlenna hmun chu ITI venga intihhlimna hmun pakhat J-18 ah a ni tih sawiin, CCTV Footage-a a lan danin, Thawhtanni zing dar 1 leh minute 35 vel khan Richard Lalhmingliana, kum 27, N. Vanlaiphai Damdawi Veng chu kawnga a kal lai H. Lalruatmawia, kum 19, Chanmari West, Aizawl a mi chuan a tlawh thlu a, Richard-a hian kawngpui tualcharah a tukkhum a sawh a, Redeem hospital panpui a ni a, Redeem doctor chuan a dinhmun a enin, Civil Hospital ah a refer a, Civil Hospital panpui a nih laiin a hliam tura lovin a thi a ni.

He pawikhawihna thleng chungchangah hian pawikhawihna tuartu, Richard Lalhmingliana pa, Pu R. Lalawmpuia chuan vawiin khan North Vanlaiphai Police station-ah FIR a thehlut a, Zero FIR register niin, pawikhawihna thlenna hmun chu Aizawl Police station huamchhung a nih avangin Zero FIR chu transfer a ni a, vawiin tlai khan Aizawl Police station-ah tualthah thubuai ziahluh a ni a, pawikhawihtu ni a puh, H. Lalruatmawia chu Police ten man tawhin, thu an zawtfiah mek a, a in puan dan a zirin naktuk lamah emaw central jail-ah dah luh a ni thei a ti a, thil thlenna hmuna awm ve thuhretute pawh thuzawh fiah mek an ni tih a sawi bawk.

Richard Lalhmingliana ruang hi vawiin khan North Vanlaiphai PHC-ah postmortem a ni.

North Vanlaiphai Welfare Aizawl chuan hetiangah tharum thawhna rapthlak tak hi a thlen tawh lohna turin kutthlaktu hi dan hmanga hrem ngei

<><><>

EDUCATION MINISTER PRESS CONF

Mizoramah zirna tha zawk a awm theih nan leh by-heart system tihbo a nih theih nan MBSE Pawl 10 leh pawl 12 board exam result-buah Top Ten leh Division tih lan a ni tawh dawn lo.

He thu hi vawiina School Education Minister Dr. Vanlalhlana'n a pisaa thuthar thehdarhtute a kawmnaah sawiin, School Education Department in Quarterly Review Meeting wawi 6-na leh Mizoram Education Reforms Committee Meeting wawi 14-na in zirna leh zirlaite tana tha zawk tur thil tam tak a ngaihtuah hnuah MBSE Pawl 10 leh pawl 12 board exam result-buah Top Ten leh Division ti lang tawh lo turin thutlukna an siam a ti a, School hming hnuaiah zirlai pass te hming leh roll number chiah tarlan a ni tawh dawn tih sawiin, he kalphung hi CBSE, CISCE

leh state tam takin an kalpui tawh a ni a, zirlai ten an mark hmuh dan kimchang chu MBSE website atangin an hmu thei vek a, Merit list leh rank certificate chu MBSE-in a diltute hnenah a pechhuak thei reng dawn tih a sawi a ni.

He hmalakna hi inelna thianglim a nih rualin zirna tha zawk a awm theihna atana an tih a nih thu sawiin, school tam takin Board exam result tha an duh avanga pawl 9 leh pawl 11 zirlai hlanchhiah a, pawl 10 leh pawl 12 Question hlui zir a, naupangte by heart system a an kal tir thin tih bo nan leh naupangin a thluak leh a rilru a hman theih tak takna, competency based learning hmanga zirlaiten competitive exam hrang hrang NEET, JEE leh a dang te an hmachawn theih nan hetiang hian an kalpui tawh dawn tih an sawi a ni.

Byte: School Education Department official

Hei bakah hian zau zawka zirchianna leh inrawnkhawmna an neih hnuah Pawl 1 atanga pawl 10 Academic Calendar chu January-December hmanga siam ni tawh turin thutlukna an siam a ti a. Pawl 10 exam erawh tuna neih hun pangngaiah neih chhunzawm a ni dawn a, Pawl 11 leh 12 Academic Calendar atan April-March hman a ni chhunzawm dawn bawk a, Mizorama naupangte'n mahni in lama tawng hman thlauhthla a, saptawng an hman nasat lutuk tawh avangin mahni hnam tawng humhalh a nih theih nan English Medium School-ah Home Language Day hman a ni dawn bawk a, class period karlaka chawlh ahzirlai ten in lama an tawng hman tir thin an ni dawn a ti.

Mizorama cheng ten Hindi an thiam loh em avangin thla khatah vawi khat tal Hindi Speaking Day hman a ni dawn bawk a, SCERT-in Spoken Hindi lekhhabu a ngaihtuah dawn a, Minister chuan Mizoram-a Middle leh High School-a Hindi Zirtirtu zingah Hindi a tawng thei lo an awm tih sawiin, Zirtirtute chu ban an tum lova an hlawh phu a hna an thawh theih nan leh zirlaite'n Hindi tawng an hman thiam zawk theih nan Hindi zirtirtute chu training mumal tak hmangin an tichak dawn a ti a, Hindi Speaking Day hi Hindi tawng thiam a tangkai avanga siam an nih thu sawiin, vai inchei anga inchei tura tih lam a ni lo a ti.

School Education Minister chuan Common Uniform chu zirtirtu kalkhawm association in ti tawh lo tura an nawr avang leh, mipui rawnkhawmna an neihah hmun 3 a thena hmun 2 in an duh lo tih an sawi bawk avangin chhunzawm a ni dawn lova, Supreme court thupek angin sawrkar leh aided sikul a thawk zirtirtu, kum nga aia rei la service tur te chu Teacher Eligibility Test (TET) Certificate nei tura bawhzui tum a nih thu a sawi a, pawl leh mimal tam zawkin an duh dan angin school tan hun chu dar 9 ah chhunzawm a ni dawn a ti a, heng hmalak dan tur an chhawpchhuah te hian Mizorama school zingah Autonomous District Councils huamchhunga Elementary a huam tel lo tih a sawi bawk a ni.

Byte: School Education Minister Dr vanlalhlana

<><><>

LADC

Lai Autonomous District Council Sorkar thara Chief Executive Member niturin MNF Member Pu C.Lalsawmzuala chu vawiin khan lakluh a ni.

Lakluh inkhawm hi LADC Hall ah neih niin Lawngtlai Bawrhsap Pu Donny Lalruatsanga an Pu C.Lalsawmzuala Chief Executive Member atan rinawmna thu a tiamtir a ni.

Puantawh angin nikum December 3 a LADC inthlanpui neihah Party mala Sorkarna siamthei an awmloh hnu ah MNF leh Congress chuan United Legislature Party dinin Sorkarna an siam theih thu Governor hnena an thlen hnu ah CEM atan Pu C.Lalsawmzuala hi ruat niin, vawiin khan lakluh a ni.

CEM thar Pu C.Lalsawmzuala chuan LADC ah MNF leh Congress inkawp Sorkarna a pian theih nan a Governor in a duhsakna leh thurawn a pek na ah te, Chief Minister in phurtaka hma a lakna ah te lawmthu sawiin, Lairam mipuite chibai a buk a, ULP Sorkar chu mipui Sorkar, langtlang taka hnathawh tum an nih thute, eirukna leh hlemhletna in hmun a chan a remloh tur thute a sawi a, Lairam chu Lalpan mal a sawm tlaka hruai an tum tih sawiin, finchhuah an ngaihna ah finchhuah thin turin helama a ngaihna hriate a sawm.

Chief Executive Member hian Dy CEM atan Pu Sanghuliana Mualchin bakah Executive Member atan Lalzahawma Chinzah, Pu HC Lalengkima leh Pu H,Vanlaltanpuia te an nih tur thu puangin, Sorkar fuke kim nan chanvo neitur dang chu remchang dangah la siamfel a nih tur thu a sawi.

CEM thar hian vawiin khan a Office a luah nghal a, LADC Sorkar thar piang chhomek ah, naktuk khian Protem Chairman kaihhruaina hnuai ah Chairman thlan a ni dawn a, vawiin khan chuh turin ULP atangin Congress Member, South Lungpher bialtu Pu C.Lalmuanthangan a hming a pelut a ni.

Vawiin a lakluh tak CEM thar hian thlawptu a neih dan naktip ni 29 khian fiah a ni ang.

<><><>

RS MP

Naktuk a tan tur Parliament Budget Session inbuatsaihna All Parliamentary Floor Leaders meeting-ah vawiin khan Mizoram Rajya Sabha MP Pu K. Vanlalvena chuan Mizoram tana thil pawimawh a sawi a.

Pu K. Vanlalvena chuan Sairang Rel Station atanga Mizoram chhim tawp Myanmar ramri thlenga Rel kawng sialna tur zirchianna hmasa Preliminary Survey zawh a nih tawh thu sawiin, he rel kawng sialna tur pawisa chu kumin Union Budget ah hian dah nghal a tul thu sawiin a rang thei ang bera he rel kawng thar siam hi India ram tan leh Mizoram tan a pawimawh ang a ti.

Rajya Sabha MP chuan Sairang rel kawng thar hi nikum ah Prime Minister in a hawn thu sawi in, Sairang rel station chu Aizawl atanga Lengpui Airport panna kawngpui sira awm a nih avang leh rel station thar a awm avangin motor kawng a lun thar hle tih a sawi a. Tuna kawngpui awm sa Aizawl leh Sairang inkar motor kawng chu a zau tawk tawh lo tih sawiin a rang thei ang bera Sairang Rel station leh

Aizawl khawpui inkar chu Four Lane kawnga siam a tul thu sawiin, kumin 2026-27 Union Budgetah dah nghal a tul thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BANK STRIKE

Ram puma Bank hnathawk inzawmkhawm, United Forum of Bank Unions huaihawtin Mizorama Bank hnathawkte chu Bank hnathawkte Inrinni zawng zawng an chawlh theihna tura sorkar nawrin vawiin khan an nuar.

Akashvani News Aizawl zawhna chhangin, UFBU Mizoram Convener Samuel L Chawngthu chuan an nawrh chhan hi India rama Public Sector Bank Union pawl lian hrang hrang 9 insuihkhawm pawl, United Forum of Bank Union, UFBU-in Indian Bank Association-in a lo rawt vek tawh, Bank te Inrinni zawng zawng an chawlh theih nan sorkar an nawrna a ni a ti a, Indian Bank Association chuan Inrinni zawng zawng chawlh a nih theih nan UFBU nen kum 2023 December ni 7 khan MoU an siam tawh a, joint note settlement pawh kum 2024 March ni 8 khan an nei tawh bawk a, hetihlai hian sorkar laipui chuan he inremna hi hman a nih theih nan thu an la chhuah loh avangin lungawi lohna hi an lantir a ti.

Byte: Samuel L Chawngthu

He nawrh hi All India Regional Rural Banks Employees Association pawhin an zawm avangin vawiin khan Mizorama bank zawng zawng khar vek a ni a, Mizoram Bankers Forum huaihawtin SBI Aizawl Branch, Zodin Square kawtah Bank hnathawk mi 300 vel bawr pungkhawmin lungawi lohna an lantir a ni.

<><><>

INDIA EU

India leh European Union chuan vawiin khan Free Trade Agreement chhinchhiahtlak tak an ziak. He inremna hi Prime Minister Narendra Modia leh European Council President Antonio Costa leh European Commission President Ursula von der Leyen te New Delhi-ah an inbiak hnuah inremna hi ziah a ni a. India leh EU te hian inremna chi sarih an ziaka hengte hi sumdawnna, venhimna, ralthuam, veivahna, khuarel chhياتna laka invenna leh green hydrogen lamahte inremna an ziak a ni.

Prime Minister Narendra Modia leh European Commission President Ursula von der Leyen te chuan inremna an ziak thei chu lawmawm an tih thu an sawi a. Thusawiin PM Modia chuan India leh EU inkara thawhdunna chu a nghet chho telh telh a ti a. Tunah hian dinhmun thar an chuangkai tih sawiin sumdawnna lama inremna mai niloin hlawkna an intawmna tur ruangam an ni a ti bawk.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawlna leh hnathawh dana inthlak danglamna tam tak a thleng a. Sawrkar hnathawhte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawnna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawnna hna thawh tikhawtlai thinte chin fel niin sawrkar hnathawhte rintlak lehzuala siam an ni.

PRAGATI hnuaiah hian Odisha-a Haridaspur-Paradeep inkara km 82 a thui rel kawng siam thar project chu chak taka nawr mek a ni a. He rel kawng hian Paradeep lawngchawlhna leh ramchhung khawchhak lam leilung hausakna hmunte a thlunzawm dawn a ni. He project hi kum 1997 January tyhlaa pawm daih tawh ni mahse chhan hrang hrang avangin hna a chak thei lova. Kum 2018 khan PRAGATI hnuaiah vil niin chak taka hnatawh a ni a. Kum 2020 khan hman theiha hawn a lo ni ta a ni.

<><><>

PARLIAMENT

Sawrkar laipui chuan Parliament Budget Session lo awm tur pualin political party tin aiawh inhmuhkhawm wawiin khan Parliament Annexe ah a ko. Defence Minister Rajnath Singh chuan he inhmuhkhawm hi a kaihruai a. Rajya Sabha House Leader J P Nadda, Union Parliamentary Affairs minister Kiren Rijju, Union Ministers of State for Parliamentary Affairs Arjun Ram Meghwal leh Dr L Murugan te pawh an tel a. Congress leader Jairam Ramesh, Dravida Munnetra Kazhagam Leader Tiruchi Shiva, Trinmool Congress leader Sagarika Ghose, leh Samajwadi Party MP Ramgopal Yadav te pawh hruaitu kalkhawm zingah an tel.

Puan tawh angin Parliament Budget session hi naktukah tan a ni dawn a. April ni 2 thleng a awh ang.

<><><>